



白佳集  
五

詩

芳人

~16  
2415  
5



和  
2415  
18-3



四佳詩集卷之十

第九

詩類

奉酬姜景醇村居雜興詩十九首


漢水澄澄一帶羅衿陽山水老烟波知君好作菟  
裘計有興濃於粥面多

細草如烟襯碧羅桃花細雨漲新波小船搖棹歸  
來晚滿袖紛紛月色多

雲烟遠近冪輕羅黃犢坡前白鳥波家在江南圖  
畫裏青山無數夕陽多

香風餅餌漲紈羅村甕新開灑綠波社鼓聲催人  
散盡柴門處處笑喧多

聖朝人物盡祀羅國史方書海不波渺渺江湖思



魏闕五雲深處夢魂多

柱笏看山獨倚闌三年強半在村間韋郎詩句王

維畫天地風流自在閑

歲春塢裏百花闌香霧霏霏几案間寫罷黃庭讀

周易此心還與此身閑

幽居寂寂歲時闌不是逃名外世間軒冕由來儻

來事人心著處也閑閑

小風吹雨濕輕闌山氣濛濛積翠間一夜稻田新

水足桔槔無語夕陽閑

光陰鼎鼎四時闌須把人間比夢間別種浮生滋

味在楞嚴一部伴僧閑

門掩落花同白墅山多羨竹勝黃岡已作東書歸

隱計肯教三逕久荒涼

步屨行行作意狂偶隨流水上崇岡斜日更留高

樹外寒蟬咽咽助新涼

南山古寺依重嶺西崦人家隔小岡送客尋僧等

閑事晚風携袖立微涼

門前杉檜老蒼蒼風動龍吟在半岡落盡燈花人

不到布衾如水覺生涼

北闕南山兩渺茫一廬岑寂對秋岡夢回當日叅

經幄一陣薰風殿閣涼

細草幽香滿院中興來小酌細君同踈簾捲盡山

如畫雲影悠悠簾半空

堯夫生死大平中朝市山林出處同自信蒼生終

有望何曾咄咄坐書空

兩山環翠似盤中肥土甘泉事事同更有何人爭  
子所十年歸興便成空

塵土東華萬火中凌兢馬骨與山同記得江南昨  
夜夢碧空如水水如空

又用前韻寄一菴專上人十六首

蕭條門巷雀堪羅世事無心強逐波時有高僧來  
問字清談也自勤人多

楊柳依依剪碧羅小池春水纈生波清時有暇尋  
僧話坐對蒲團一味多

金剛山水甲新羅俯視東溟日浴波寺在虛無不  
知處山中歷歷白雲多此上人曾遊金剛

春寒惻惻透輕羅南浦新愁漲綠波莫說傷心離

別事無情白髮鑷還多今春與上人別

奔走功名歲月闌歸心長在水雲間紅塵滿面青

衫弊逢著高僧愧不閑

挑盡寒燈夜未闌杜鵑啼月隔窻間記得當時讀

書寺鬢絲禪榻兩閑閑

當面青山十二闌上房花木列中間何時更借僧

牀坐贏得浮生半日閑

策筇無語立東闌春在紅紅綠綠間過却一春閑

不得人生得意不如閑

一菴何處是禪房千丈蒼松萬丈岡半夜風聲吹

作雨小窻分得十分涼

藏魚寺裏石橋傍南畔是溪北畔岡記得携壺送  
客處十年往事夢淒涼昔與上人錢客藏魚寺裏尋僧到

遮日岩邊送客歸日暮東風吹滿袖小橋立馬思悠悠

師僧飛錫飽遊方回首重岑與複岡今日偶然供  
軟語半簾斜日逗微涼

三生結願已凝香擬結茆廬駐半岡自有聲名繼  
支許山門故事不淒涼

世態膠膠擾擾中紅塵白首愧雷同逢師面目真  
如舊一笑呵呵萬事空

梅花斜插淡瓶中相對無言骨格同直到夜深清  
似水一輪明月輾青空

點檢容顏小鏡中今年較不去年同醉中徃徃逃

禪去錯被人欺誤學空

樓臺多少有無中古木回岩寺寺同我是前身狂  
李白題詩醉墨灑晴空

梁純夫姜景醇約同飲橫城京邸因病未赴  
仍吟一絕以寄

小雨薄如霧好花濃似烟時聞兩閣老邀我同醉  
眠白髮老如許青樓狂復顛胡然負好約抱病真  
可憐

子固遣女奴問訊仍吟一絕以寄

隣里交情日漸勤女奴長遣問寒暄憑渠為說通  
家好從此宜教講細君

送姜景愚赴京

燕山鬱蒼蒼道路何悠悠君今仗使節聊復訝遠  
遊男兒事功名晏安非所求出門一笑去意氣何  
揚揚我有一斗酒為君別河梁蕩蕩白玉京遙遙  
蒼海傍江山日以隔我心悲以傷去去惜良圖慰  
我相思腸

我昔賦遠遊為訝遠遊篇朝騎漢陽馬莫上鴨綠  
船鶴野浩漫漫閭山長鬱紆長城吊祖龍漁陽怒  
羯胡空聞易水流不見黃金臺我生多好古慷慨  
從中來去去送君去因之有所思恨無雙飛翰與  
君相追隨

吳居士還自湖南戲贈

居士年來厭俗氛掛冠十載掩高門何須林下是

真隱舉世紛紛不識君

居士今年賦遠行湖南無地稱高情歸來更與細  
君說大隱無如隱市城

與宋樞院

處寬

梁樞院

誠之

李叅議

芮

任叅

議

元濬

同遊藏魚寺洞

早歲同被鑿坡選聯裾出入光明殿朝退歸來香  
蒲袖曲江花柳開小宴醉裏談笑吐虹霓作詩揮  
翰相品題中間世事何茫茫雲離雨散迷東西今  
夕何夕相邂逅也宜秉燭繼白晝城西古寺境幽  
絕石澗冷冷雲出岫臨流列坐飛羽觴插花滿頭  
紛清香雖無絲管可娛悅亦有棋博歡逢場落日  
欲沒西山巔衆賓皆醉狂復顛歸來馬上發高謔

太平盛事今當年

三月三日在秋部送酒債于推刷色諸君子  
一年一度清明節三月三日天氣新雖然酒債尋  
常有解送如予有幾人

李之安見和即次韻

一年佳節是青春上巳風光滿眼新五五三三何  
處客出門皆是看花人  
好風晴日安排暖杏艷桃嬌次第新報荅青春唯  
有酒青樓落魄屬何人  
曲江花柳不勝春日典朝衫發興新明月杏花踈  
影滿夜深扶醉倩傍人  
我笑杜陵定後身蹇驢烏帽白頭新曲江三日空

腸斷肯立東風是麗人

同榜交親二十春白頭今已免如新相對樽前論  
世事青雲知己豈無人  
世事紛紜混質真雲翻雨覆物情新舊遊零落如  
風葉我輩相從是故人

又次李之安詩韻

伯仲招提壓水頭讀書有暇弄閑鷗追思二十年  
前事且問居僧今在不  
奔走紅塵已白頭一生蹤跡愧沙鷗故園歸興濃  
於酒此興煩君似我不  
豐水澄澄似鴨頭釣舫歸去不驚鷗佛巖我亦茅  
廬在晚節同隣肯許不

青山數朶佛陀頭春水如藍欲染鷗回首江南無  
限景不知曾似畫圖不  
自古功臣少到頭十年歸夢到閑鷗悠悠身世紆  
簪紱萬一君恩報得不  
休論世事白鳥頭欲學滄波萬頃鷗自斷此生難  
自斷行藏可似古人不

端午日

幸慕華館閱武觀射侍宴有作

天中佳節屬清和閱武城西駐翠華甲冑風生雉  
熊虎旌旗日射動龍蛇武臣獻技皆穿葉詞效呈  
才滿插花曲宴未終甘澍至太平恩澤一時加  
是日有雨次鄭子文詩韻仍奉別

喜雨良辰有滄祈天工造物本無私村家預識豐

年樂賽罷田頭盡醉歸

佳節天中又上旬江梅欲子杏生仁送君嶺外無  
窮思獨坐悠悠白髮新

初八日 思政殿 御前講中庸鳶飛魚躍  
章

從容咫尺近天威又被宣恩講聖書豈有小臣堪  
顧問須知聖德自謙虛鳶魚道體天淵裏位育功  
夫養省餘萬古帝王傳授法願將中字獻宸居

講罷

上命

臣

及吏曹參議

臣

任元濟註

御製射侯詩立進

天章御札煥星奎伏讀微臣首屢稽振玉聲金有  
條理經天緯地軌端倪商周灑噩言猶在雅頌汪



洋道可齊豈合微才添註脚驪珠眩眼使人迷

題畫蘆葦小扇

十年歸夢繞滄洲奔走紅塵白盡頭今日畫中無限思蕭蕭黃葉滿江秋

碧筩飲

高塘六月雨新足荷葉翻翻大於席折來作筩筩為杯滿眼盛酒葡萄碧舉頭仰天雙手擎象鼻彎彎香欲濕一吸霜雪沃煩腸再吸羽翼生兩腋三吸居然到醉鄉日月茫茫天地窄我生愛蓮亦愛酒此性此興天所癖安得有酒長如澠荷開萬丈長不落盪漿歸去若耶溪痛飲長醉江南月

次韻李次公詩四首

閑中身世黑甜餘懶性宜堪水竹居日轉樹陰移榻去風來雲影滿空虛山中何日收如橘池下今年種婢魚多病關門少相訪故人書信定何如  
豆粥稠衾不願餘只將踈散送諸居慙無事業希君實豈有文章擬子虛自古守株難待兔何人緣木可求魚平生萬事宜安分得失榮枯我自如  
寂寂茅齋丈笏餘焚香端坐是僧居廉纖細草裙腰短漱灑新池鏡面虛風捲紙窻飛野馬日長牙帙落書魚作詩要學安排法心似前賢語不如  
奔走紅塵白首餘幾番歸夢繞田居幻泡身世徒為妄箕斗聲名亦本虛晚歲山中看射虎初心池上坐觀魚小窻終日多情思倦鳥閑雲得自如

次韻次公詩四首

昔年重榜聯名姓諫院風流又一時階映紫薇風  
荏苒砌翻紅藥雨霏微朝回滿袖香紛郁晚退鳴  
珂影陸離當日詞人誰杜甫尋梧埤竹謾題詩  
嗟君妙藝今還屈愧我虛名誤一時只有詞章工  
篆刻何曾性學透精微宦途本自多榮辱人世須  
知足別離去歲東雲北樹思一樽今喜細論詩  
跌宕高談應忤俗迂疎古態已違時閑中縱博籌  
行熟病後揮毫筆力微已分揚雄甘寂寞肯從莊  
叟學支離小窻睡起無餘事坐對終南恰得詩  
小池新水漲漣漪興在扶筇獨立時風動荷香來  
斷續雲陰山氣轉熹微中歲歸田思靖節殘年學

道擬鍾離閑中歲月渾貧病收拾風光只小詩

即事二首

捲簾楸影落繩床半頂烏紗睡味涼一陣南風晚  
來雨滿院都是碧荷香  
小沼如盆水淺清菰蒲新長菰芽生呼兒為引連  
筒去養得芭蕉聽雨聲

去年六月十三日與吳居士蔡子休賞蓮子  
固家今日正當十三日追憶往事吟成數絕

錄示子固四首

去歲君家荷政開荷花月色兩佳哉今年此興還  
辜負肯喚鄰翁傘雨來  
葉密且看傾似蓋花開曾見大於船無人識我尋

芳興欲續瀟溪說愛蓮

高談傾坐吳居士妙句驚人蔡使君當日主人彈  
錦瑟東鄰有客獨醺醺  
荷開較比前年勝月亦應從此夜新若使舊塘拚  
勝會題詩落魄豈無人

送金書狀軺赴京

去年持節到全燕歷歷關河路四千遼野閭山東  
際海灤江薊樹北連天一代人才全盛日太平人  
物中興年至今猶記釣天夢矯首時時望日邊

次洪南陽韻四首

今年足靈雨未足洗儒酸任使琴書潤長愁酒盞  
乾巡園時杖屨閉閣不衣冠客有投詩者沉吟仔

細看

冰盤浮夏果李杏雜甜酸可使詩腸潤何曾講舌  
乾南郭長憑几東門未掛冠小塘荷政發金雨幾  
回看

世事心長熱人情鼻自酸但知琴上趣不覺釜中  
乾何日同鳧鳥多時愧鶡冠有時聊遣興寄與故  
人看

長年憂足蹙今日痛腰酸自可重然諾何曾患沒  
乾喜情能折屐怒髮欲衝冠忽有雙飛鳥無心仰  
面看

再和次公詩韻二首

知子蹉跎數載餘安能鬱鬱此長居生前富貴苦

相逼名下人才定不虛已見明時來鳳鳥肯從爾  
雅註蟲魚吾生碌碌願何厚鵬鷄由來自不如  
立志當初頗自竒慙無所得効明時憶曾姓字題  
紅紙不日聲名動紫薇歲月悠悠成蹭蹬功名落  
落轉乖離自多白首知音在好遣長鬚日逆詩

三和二首

四壁圖書萬卷餘塊然獨坐自居居墻低碧岫頭  
頭出簾捲青空面面虛老去何曾妾換馬筭來寧  
復我知魚人生貧富皆聊爾倚市端知綉不如  
垂老髮無還黑日逢人眼有暫青時物情自古多  
炎冷世事由來寢盛微生擬百杯同李白死當三  
尺近要離世間有味閑為最獨坐沉吟改舊詩

四和二首

篋曾不足盍何餘自信生來守索居鞍馬顧非顏  
矍鑠詩書長愧腹空虛只願生前樽有蟻休嫌門  
下缺無魚捲簾當戶南山近偃蹇高姿我不如  
兒癡官事百無知勲業何能蓋一時自古英雄皆  
際會由來將相起寒微丈夫出處思三就宦路浮  
沉嘆十離獨坐撚髯無好句煩君為我一砭詩

五和二首

自是功名憂患餘殘年直欲賦閑居孤雲漠漠連  
平地一鳥飛飛沒太虛晚愛葵花來蛺蝶早知荷  
葉蔭龜魚閉門趺坐無人到身與孤僧兩自如  
止足由來知者稀田園有計已多時道情漸熟世

情薄歸興已濃官興微荒逕春來花苒苒薄田秋  
後稻離離名纒盡脫吾當去勝水佳山總是詩

閑中雜興三首

茅簷剪剪小墻隈無數葵花晚節開睡覺午牕人  
正靜日長唯有燕飛來

半畝方塘漲綠波芙蓉短短長蒲芽巡園落日移  
時立細細香風滿袖多

燈殘月闇夜寥寥竹簟藤床暑不消不覺更深涼  
是雨忽聞新響在芭蕉

昨訪平仲園中多種奇花異卉盆甕亦一一  
羅布艷麗可詠歸來戲作以寄

君家庭院絕塵纖斛斛奇花興政酣不用道人殷

七七已開詩老逕三三風前獨倚烏皮几雨後閑  
携白柄鏡自笑小園池半畝菰蒲菡萏似江南

園中雜興四首

小小荒園棘作籬山薑已子芋生兒朝來老婢供  
盤饌相對夫妻樂足時

瓜蔓扶疎結子稀紫茄時見雨露肥可憐高大芭  
蕉樹却擬終年抱十圍

匏葉翻翻引架長花開續續細生香秋來劈作深  
盃看倒盡千鍾洗腎腸

秋來芥子老無香為有蔓菁只可嘗別種貧家滋  
味在丁寧且莫說膏粱

七月六日

七月六日苦炎蒸詩句吾今憶杜陵憊卧如泥猶  
中酒渴心生火苦思冰門前權襪那無客寺裏安  
閑愧有僧却欲馭風凌汗漫人生兩翰亦難能

謝金少尹同年未濡送菘菜子

我有荒田數頃餘秋來擬種滿園蔬感君多送青  
菘子急喚僮奴送弊廬  
圓莖如竹葉如磐滿甕沉虀味自酸預識秋來滋  
味足煩君為我一來看

秋官即事書示日休

明時無事訟庭空獨倚烏牀睡政濃小吏跪前呼  
罷仕柳陰騎馬日方中

用前韻

沉沉畫閣簾紋空睡鴨焚香碧霧濃一椀冰漿消  
暑氣蟬聲高下綠陰中

壬午七月既望與蔡子休金子固辛敬叔出  
遊廣津楊半刺子淳亦來會五首

壬秋七望廣津頭擬續前賢赤壁遊月色有情今  
夜好江流無盡幾時休高詠長笛蛟應舞妙句豪  
談鬼自愁俯仰英雄嗟渺渺蘇仙不獨擅風流  
白沙如練水如油快馬歸來更上舟帆影飛飛同  
去燕槽聲軋軋起眠鷗長風剩借新秋興小雨纔  
添薄膜愁醉卧江皋衣半濕又邀明月泛中流  
跌宕詩人子瞻後風流刺史山簡前一時盛事懽  
娛地同甲交親少壯年歲月幾何曾聚散江山如

此更留連古今人物存公論我輩聲名莫漫傳  
江亭老樹露龍身十畝濃陰坐萬人滿袖清風翻  
白紵回頭落日岸烏巾盃傾燒酒香如桂箸下纖  
鱗縷似銀舉目江山非昨日暫時相賞莫辭頻  
通宵樂極耿無眠有意明朝復醉顛望指終南移  
緩棹流沿漢北更回船塞蓬小坐平看水扣柂高  
訶仰見天有約丁寧須記取明年此日此江邊

送金佐郎佐幕慶尚道二首

南郡多才士蜚英際聖明郎官名不負幕府選非  
輕已有埋輪志爭誇衣錦行此行君自辦負弩幾  
人迎

昔在南宮日同僚笑語陪如君真大手以我愧踈

才取次三年席分離一酒杯行當重刮目徵詔日  
邊來

姜景愚畫屏八幅

黃橘

秋入霜林葉半無黃金磊落壓枝低后皇有意生  
嘉樹誤被傍人喚木奴

栗木

栗子如拳秋正熟狙兒得意疾於飛朝三暮四渠  
休管飽食無言自在肥

西瓜

瓊漿玉液舌瀾翻種出西方品可論莫說張郎多  
好事世間不乏渴文園

茄子

秋風茄子紫彭亨步屨巡蔬眼忽明今日畫圖風韻在故園回首不堪情

石榴

滿腹珠璣面渥丹紛紜桃李總無顏世間肉眼溜溜是錯把儒酸比汝酸

红柿

秋深紅葉晚凝霜蚪卵牛心顆顆香嚼破甜甘能悅口邇來三月肉全忘

甜瓜

山下吾家一兩區秋風瓜蔓走龍鬚呼兒欲摘筠籃去仔細相看是畫圖

黃瓜

看來碧玉嚼來冰畫裏依然憶我曾萬事只耳防納履摘來休問是青蠅

賀崔新恩兄弟同登文武科榮親詩

君家文武弟難兄籍籍聲名一代傾虎榜已隨龍榜出儒林爭與羽林榮北堂衣錦雙親喜南郡開筵萬目驚可是邦家敦孝理太平盛事屬科名

有懷寄子固

世事驅馳歲月悠芙蓉零落滿園秋誰知池上魚之樂莫使花前蝶也愁

謝 約姜菁川訪一菴專上人以病不能詩以為



上人喜儒者我亦愛逃禪曾共菁川約去同松榻  
眠豆腐軟堪多茶湯香可煎蹉跎入世事今又病  
相纏

憶昔藏魚寺尋僧無送人聯詩遠有罰酌酒亂無  
巡隨意坐騎石忘形時脫巾悠悠思往事瞥眼十  
青春

再和

病餘坐閉閣一味即僧禪歌枕閑尤樂讀書倦必  
眠龜腸多食忘蟹眼點茶煎白髮厭塵世山門與  
自纏

正月到二月餘寒猶襲人屨會看柳步簷或訪梅  
巡靜有烏皮几慵無白氎巾誰知閑是病春睡賞

青春

三和

山僧亦喜俗俗客多愛禪會合有前約團圓宜共  
眠香爐栢子炷藥鼎松葉煎拂袖我當去青藤行  
脚纏

行携水上佐坐倚竹夫人緞筆一二紙圍碁三兩  
巡欲知酒中趣莫負頭上巾梅柳不堪興滿眼今  
復春

雲月軒

白白山上雲皎皎天中月雲兮本無心月也自有  
色上人坐相對忻忻有所得雲能有舒卷月亦有  
圓缺萬物有變化大虛獨自若師乎勤著力往問

安心法

次吉昌相公詩韻奉 upper 列相座下八首

滿城花柳一年春  
小雨朝來發興新  
有約訪人江上去  
絕勝騎馬傍紅塵

今朝已辨醉江頭  
勝日叨陪上相遊  
欲上濟川亭上望  
春江無際思悠悠

右上古昌右相

勝賞高樓滿座春  
風流文雅一時新  
漢江綠漲蒲萄酒  
白鳥飛來不染塵

蓋世功名尚黑頭  
龍門自幸早陪遊  
煩君能記貧交句  
雉嶽驪江一夢悠

右 upper 上黨韓相

乘閑始出鳳城春  
萬物欣欣生意新  
已信廟堂霖雨手  
乾坤潤澤絕纖塵

衮衮長江不盡頭  
地靈人傑百年遊  
風流宇宙無今古  
赤壁黃樓往事悠

右 upper 高陽左相

池塘春草謝家春  
萬古聲名五子新  
兩相有詩人膾炙  
不才何幸揖清塵

儒冠跌宕雪渾頭  
兩子功名事宦遊  
賴有諸公容落魄  
詩顛酒癖任悠悠

石自叙

到中山村墅二首

走馬來村野茅廬已半傾  
山為仁者樂竹也聖之

石自叙

十七

清杭飯香流七黍醪白蒲瓶殷勤有隣叟農話到三更

頗覺宦遊倦今知野趣酣討尊携幼去燒芋共僧談過鳥飛青嶂遊魚出碧潭晚涼携杖立嵐翠濕輕衫

送日休赴京

黃金闕下五雲低重到燕山快馬蹄遼野停車秋望鴈秦關欹枕曉聞雞市橋風冷沽新酒驛壁塵昏覓舊題預辦歸來軟行脚春風爛熳聽鶯啼

送日本機外上人五十韻

日域扶桑外朝鮮漢水邊鯨濤望不極木道僅相連

聖主膺圖後遐邦慕義先上人真韻釋奉使續前賢三百詩能誦四方對可專初聞名籍甚相見喜  
茫然道骨衣冠整明庭玉帛慶周旋儀不忒進退禮無愆清淨心非累空虛性自圓既能忘外想亦復悟真詮面壁業曾白遊方談又玄一生那住著  
萬里任蹣跚跡似浮萍草身如脫殼蟬死生真露電得失了蹄筌自說東浮海曾遊北抵燕江湖兩足繭宇宙雙眼穿重到三韓國追思數十年自將真面目得閱舊山川昭代漸聲教輿圖廣幅員儀文多盛羨禮樂播昭宣濟濟賢才盛熙熙民物全  
四方瞻舜日萬井樂堯天干羽兩階化梯航重譯聯宣威沙漠淨獻捷凱謌還定不勞三箭拔皆受

一塵無思心不服有識頭皆延遠被懷綏洽親承  
卷頤偏南宮頻設宴東館幾開筵鳳闕宣招數龍  
墀寵賚駢官壺何漱灑內饌復芳鮮樂奏能盈耳  
花簪已壓顛深恩肌已浹盛德骨堪鐫使節真能  
事往來是勝緣流光亦云暮行邁且言旋乞句還  
盈袖馱經已滿船朔風吹似箭騰雪亂於縣飛錫  
鷄林月浮盃馬島烟搖搖孤艇疾去去一帆懸蜃  
市行觀海鰲峯歷訪仙晨征龍八鉢夜宿鶴巢肩  
秘術通三昧竒遊遍大千梅殘方丈下松偃舊房  
前此日能回棹何時復坐禪去宣聖化重永使鄰  
好堅兩國為家日三垂奠枕眠天山弓可掛滄海  
箭無傳日月同文德乾坤八化甄師歸倘相憶記

我贈行篇

二月初一日庚申約與姜景醇任子深李平  
仲姜國鈞同會病不往叅戲書以寄

四旬四甲子首歲首庚申喜見諸君會空嗟獨病  
身聯裾無外客密席有佳人寄語少年子風流莫  
厭頻

送鄭宰相

赴京

已巳秋景泰初即位正統北狩以聖節使赴京

中原多故聖中興奉使問關屬老成終子棄繻增  
壯氣蘇卿持節仗忠誠似聞塞上黃雲捲喜見天  
中白日明去謁彤庭紆異睠歸來得意馬蹄輕

賀李大諫

擢

青雲萬里恣騫飛一日聲名動紫薇埤竹尋梧詩

正就清時自覺諫書稀

二年承乏諫大夫補袞會慙一字無喜見朝陽鳴

鳳在誰知物議似君孚

山花織織柳梳梳大諫新開錦宴齊堪笑先生狂

復興春風已判醉如泥

吉昌權議政獻大夫人壽于西湖亭

鶴髮龍頭盛事新西湖獻壽勝筵頻人間富貴三

公子世上尊榮八袞親

躑躅花開紅細細葡萄水漲碧鱗鱗東風十里笙

哥咽盡是門闌同樂人

園中四詠

松

誰屈凌雲姿種我一片石恐此握中太誤被胯下

竹

直道不會屈大節明昭昭三月不知肉復此聽簫

韻

蓮

種出大華巔根連雲夢澤天之培者栽我所種也

德

梅

陰陽迭消長古今亦異宜我讀君子詩大叢方在

茲

偶吟

人生有味不如閑寂寂幽居晝掩關客至不嫌生  
計拙芙蓉數朶竹三竿

次申知諫自繩同年韻

紅藕池塘細細香好風携袖納新涼一樽酒盡來  
山雨此興此時誰與詳

草堂深處百花香好雨廉纖送晚涼醒亦自醒醉  
自醉中間得失不須詳

申同年自繩携酒見訪詩以為謝

年來多病故人疎多謝高軒枉弊廬榼裏黃金初  
煖鳳壺中碧玉欲浮蛆情懷款洽談論裏詩語清  
新咳唾餘屈指同年幾人在殷勤亦復更相於

次洪日休同年韻

廣文天下冷中散一生慵以我本無狀於時免不  
逢南樓邀好月北牖引清風誰識閑中味脩然一  
放翁

名宦苦相逼浮生知有涯酒杯聊救渴藥餌豈扶  
衰却怕頭毛改頻驚帶孔移人生適意耳何可廢  
吟詩

才名君跌宕世事我踈狂往復百千首縱橫三兩  
行欲携烏有子為訪無何鄉萬事有真宰蒼蒼誰  
主張

送日本僧

天開景運海無波萬里扶桑作一家兩國講和通  
使節上人銜命泛靈槎雲消蜃市層層閣雨洗鼈

岑點點螺專對歸來富奇興故山烟月護松蘿  
永川鄉園中八詠

松

蒼蒼一握立中庭意欲凌空挾震霆可是貴人偏  
護惜斲苓終必制頽齡

梅

飛飛瞻雪欲窮陰生意津津自不禁負手巡簷時  
索笑南枝時復見天心

躑躅

春山處處怨啼鶻一夜花開暖欲然不似畫堂催  
羯鼓爛紅無數靠闌邊

柳

東風裊裊黃金條低拂瓊闌不勝嬌自是高懷愛  
清瘦不須容易學纖腰

竹

耳教日日護龍根隨意東風長子孫更識主人勤  
解帶會看高幹拂層雲

楓

剗地西風玉露彫紅扶野色上輕梢凭欄秋興濃  
於酒一片沈湘畫不消

菊花

看花次第到黃花秋興東籬晚更多直把金英宜  
泛酒挿來可怕損烏紗

蘆

軒冕何曾累世間雅興終不負湖山黃蘆滿眼花  
如雪身在江南自在閑

送尹同年子佐幕慶尚道三首

倚閭亦是慰佐幕時所榮子節兼臣節文星照使  
星才名浮物議孝道重鄉評揚顯能如此君恩骨  
可銘

巡遊七十郡飛駟不驚塵幕府文書簡庭闈省問  
頻君能愛短日親已享長春欲和南依什由來不  
乏人

繁華足南國處處好樓臺登眺詩千首風流酒百  
杯今君持節去昔我打袍來憶得揮毫處花錢九  
萬枚

詠張槎

渺渺秋風犯斗槎客星已報動銀河崑崙源上天  
如蓋牛女橋邊月似波漢武開邊無足哂張郎好  
事莫須誇殷勤為向成都問天上人間料不差

奉和吉昌權相公詩韻寄題西原

西原勝事古無聞衮衮諸賢聚似雲同日聲名聯  
桂榜一時文彩動梨園明眸皓齒三行密痛飲狂  
譎滿座喧往事繁華曾一瞥悲懽存沒不堪論

右揔叙

少正豪氣洗儒酸上黨吉昌伯仲間既許開樽同  
北海自將携妓擬東山英雄跌宕真如此賢達風  
流尚可攀兩相聲名終不負笑談麟閣到台班



右上古昌上黨兩相

落魄懽娛彼一時重來物色夢耶非故人奔月嗟  
何及有客尋春恨較遲暝雨朝雲俱寂寂落花飛  
絮故依依風光如許愁無盡憾慨題詩知為誰

右述李銀臺詩意上古昌

誰數當年白面生自多花籍暗知名黑頭宰相重  
遊日青眼佳兒一笑迎只合風流紅袖拂不須惆  
悵綠陰成人何解聽琵琶曲任是無情亦有情

右上銀臺李學士文燭

青樓詩酒少年狂屈指悠悠二十霜縱是周墀今  
拜相為誰杜牧去尋芳雲雨鄉中無復夢鳳凰音  
裏有餘傷雖然善謔男兒事自信為吾鐵石腸

右自叙

三月三日書懷寄吳君子

身世吾今四十四風光正屬三月三陌頭楊柳碧  
初細墻角杏花紅政酣萬事悠悠亦聊爾一生役  
役非所堪誰家有甕酒如海行樂及時和且湛

送尹同年子滌

分巡慶尚道仍覲親丹城

一日除書降紫闈春風驟馬疾於飛北堂喜見斑  
衣舞南郡爭誇畫錦暉指佞飛霜增慷慨宜男愛  
日最芳菲一生忠孝餘何事君寵親恩報不違  
漢江新漲綠如醅江上春風首獨回我送范滂攬  
轡去人驚暴勝持斧來鷄林人物歸囊橐鼇岫風  
光領酒杯安得月明携玉笛瞻星臺上共徘徊

六月日陪高陽領相李判京兆石亨洪中樞  
逸童登興天寺樓遊賞明日寄題一卷

六月興天寺岑樓快共登能詩皆好客軟語有高  
僧簷送蕭蕭雨盤行點點冰欲消三伏暑捨此更  
無能

對花有興四首

短短茅簷小小齋南山當面過墻來日長無事亦  
無客檢盡園花開未開  
數朶香葵高十竿紅紅白白間朱殷前花未落後  
花發七月將來六月殘  
淺淺方塘貯小虛好風吹雨折紅蕖晚涼携杖移  
時立滿意清香襲兩裾

梅花直到菊花時次第相看次第宜昨日菊花和  
雨種東籬把酒未應遲

新拜大司憲

烏府清班動百官不才承乏愧朝端何人自有風  
霜面今我元非鐵石肝直劍不辭終百折曲藤何  
用要千蟠幸逢昭代無封事鳴鳳朝陽尚亦難

送金子固赴韓相幕二首

元戎幕下總豪英多子功名在此行試看腰間三  
尺劍逢人莫說是書生  
長白山高黑水澄胡兒愁眼似秋鷹請纓自是丈  
夫事白首如子愧不能

江寧君洪公

元用

林亭詩韻

南陽忠義至今新功業箕裘早致身雅興東山會  
作主清樽北海復娛賓朝英滿座人人傑國老題  
詩字字珎先榜有兒吾輩在殷勤不厭酒杯親

即事

剪剪茅齋一兩楹綠陰幽草稱幽情風前戲蝶堂  
堂舞雨後閑蛙閣閣鳴移竹自然依石砌折花無  
數挿磁瓶焚香獨坐無人到時聽鄰家鍛鐵聲

曉咏自嘲

鄰翁鍛鐵四更初我起朝參已盥梳等是生前謀  
口腹豈知忙裏送居諸食功似汝慙何有竊祿如  
予愧不除聽得晨鍾促騎馬功名亦是一蘧蔭

九月十四日寄洪日休

君閑無事我奔忙會合蹉跎數月強月色更從今  
夜白菊花渾似去年黃風流到此濃於粥門戶由  
來冷比霜若使高軒如一過應拚詩酒共顛狂

秋興

英英東籬菊時至亦可詵我生喜幽逸樂者逢此  
繁悠悠時世情苒苒歲月換落葉滿階除秋風吹  
又散

秋夜月白獨坐有懷

山月皎如燭紙窻明似燈無心真似塑有髮獨非  
僧人語通宵寂秋聲半夜增最憐小童子熟睡喚  
無應

賀李公坡尹公贊李公季全申公灑尹公弼

商同日拜承旨題寄李承旨

一日黃麻降紫霄銀臺連袂五蟬貂諸君承寵舍  
鷄舌獨子傳家有鳳毛北斗天樞司帝命東瀛地  
位屬仙曹烏臺老物無長策賢頌宜先賀聖朝

偶吟三首

無人坐盤礴有興立徘徊啄雀避人去飢貓呼主  
來風旛疑烈火雪履響軋雷覓句時還笑詩材富  
酒材

鳳凰今寂寞牛斗欲徘徊百歲堂堂去長江衮衮  
來明時遇堯舜交道愧陳雷二策皆吾短文材似  
吏材

野雲生浩渺簷日苦低徊黃鶴上天去青山排闥

來年將頭似雪時或鼻如雷聖代方招俊何人記  
散材

至日曉起

亞歲是今日晨鐘報五更已於子之半轉覺陽已  
生添線非吾事觀梅見物情陰陽有消長世道復  
時亨

送金子固赴韓元戎幙下

今日是南至念君將北征關河幾千里風雪又長  
程古說從軍樂那堪送別情男兒當磊落吾亦請  
長纓

讀史進退格

碌碌元非大丈夫他年芳臭兩無稽後人猶自論

班馬直筆從來說董狐豪傑悠悠三尺劍江山寂  
寂一九泥春秋衮鉞非吾事撫卷多時惜壯圖

醉起詠雪

昏醉睡已熟北風吹更醒不覺夜來雪南窗先曉  
明

重九侍宴序賢亭次 太祖御製詩韻

眼中平看千萬峯天地吾王度量中聖子神孫至  
今日八荒四海總包容  
神功馬上捷雲峯萬古三韓德澤中聖主即今繩  
祖武大平盛事孰形容  
五雲宮闕華山峯閱武脩文在此中多小明良皆  
際會行謔醉飽自從容

寄咸吉道康監司

匡山同學舊書生遭遇蜚英事可驚白筆包囊吾  
事業碧幢紅幙子功名關心且莫傷離別努力當  
須報聖明聞說此庭清似鏡何時更築受降城  
權舍人 綸 奉使耽羅還說水路艱苦之狀詩  
以誌之

渺渺耽羅八月槎使華風味定如何回頭天地端  
倪少入眼蛟龍出沒多魚好能令腸作惡橘香唯  
覺鼻生醴憑君莫說當時事皺盡紅顏白髮加

送金子固為西北從事官

金侯是我西道主妙齡好文仍好武西原門下號  
得賢滿門珠履盈三二君乎投筆慕宗慤毛生穎

脫非碌碌所以入幕居上頭國士當以國士酬一  
索欲繫降虜頸淨掃朔漠明似鏡嗚呼丈夫貴立  
志功名磊落當如此功名一戰封萬戶安用腰間  
印如斗且問大將今是誰宋朝魏國韓太師  
奉呈李僉樞 宗儉 李叅判 宗謙 兩大先生時  
皆在陽智村墅

二陸才名當日重兩疏聲價晚年高男兒出處終  
無愧自信山林隔市朝

恩津東軒次李伯玉 石亨字伯玉 詩韻

昏騰殘醉尚夢夢四顧竒觀一望中當戶青山皆  
拱北捲簾紅日已生東黃花有信仍秋露丹葉無  
心戰晚風北去南來成底事行藏終欲問漁翁

全州次圃隱先生萬景臺詩韻

尚想豎郎意氣橫紛紛成敗暗傷情一朝自作蕭  
牆禍百戰終非鐵甕城大數真人與白水老奸何  
物誤蒼生登臨豐沛龍興地益切思君望玉京

次全州東軒詩韻二首

大勢須憑蚌螭觀鴨鷄功業擔河山秋風一為豎  
郎晒怒髮無端欲豎冠  
故國繁華屬壯觀名區次第好江山休嫌過客龍  
鍾極醉倩佳人為整冠

任實東軒次韻三首

秋風吹斷宦遊情萬里湖南湖水清驛樹依稀紅  
葉亂鄉關迢遞白雲橫流光背我堂堂去華髮欺

人續續生獨坐客軒成小睡忽回茅店午鷄聲  
排闥青山不世情時聞爽籟有餘清長安回首三  
峯遠故國歸心疊山橫時將向連城逆旅悠悠長作客  
虛名役役豈謀生大平堪畫村村景鷄犬聲中打  
稻聲

行盡湖南見物情江山無事樂時清酒狂肯為詩  
狂屈豪氣常隨劍氣橫壯志何曾遠白首雅懷終  
不負蒼生使君為政清於水更喜絃誦六載聲

葵樹驛樓次韻

萬里江山百尺樓元龍豪氣清難收至今葵樹餘  
風在徒倚闌于段段愁

南原丑川亭詩并序

蒼龍壬午十月日將之嶺南道出名區府  
使宋君衣設筵來迓于此軍籍從事官高  
君慎驕尹君孝孫成君允文田制從事官  
吳君凝長興下使君范錦山李使君始元  
樂安鄭使君汝卿寶城秦使君有經綾城  
金使君慄淳昌崔使君淵茂長李使君由  
義金堤金使君碩玠原李使君真粹高山  
李使君文坪康津權使君璠葵樹金察訪  
仲哥來會從事官洪君聆亦在座賢主人  
交好之雅也若高尹成三從事下長興金  
綾城李玠原金葵樹秦寶城李茂長皆同  
年也吳從事僕再忝同僚於蔽垣春官者

也李錦山鄭樂安崔淳昌皆斯文骨肉金  
金堤李高山權康津皆親戚故舊而相交  
之善者也我輩中因仕宦睽離南北有不  
得相見者或二三年或五六年今得一時  
邂逅於湖南千萬里之地懽笑怡愉獻酬  
交錯樂可知也吳尹兩君語予曰帶方吾  
鄉今茲勝會不可不志以傳諸後遂求題  
咏僕雖詞拙雅意不可負僅作近體七言  
三首以記山川之勝會遇之樂非以為詩  
聊為諸子先鳴而為後日題詠之張本也  
詩曰  
緣崖絕壁畫屏開更有高樓石作臺萬古溪聲流

不盡百年山色矗成堆鐵牛何日能呼起

亭邊有鐵牛名

日丑川蓋本於此

黃鶴今朝可跨來此是帶方佳麗地風

流題詠愧非才邀我諸君一笑開相逢携手共登  
臺已將謔舞當筵樂更有杯盤滿眼堆情深不覺  
遲遲飲大醉從教緩緩來一一南州賢太守斯文  
數子總雄才

百年懷抱向誰開有興明朝復上臺水落山間白  
石出秋深岸上紅葉堆流光奈此堂堂去勝地何  
妨衮衮來我欲留名無好語落霞孤鷺是真才

廣寒樓次韻三首

見說南州第一樓登臨身在六鼇頭一邊白水來  
無數四面青山散不收芳草晴川追往事茂林脩



竹愜前遊欲仍羽客丹丘去方丈二山不外求  
久倚瓊闌不下樓開筵況復有鼇頭金杯迺送時  
相勸銀燭高烧夜未收邂逅他鄉皆好客風流勝  
地亦奇遊雲離雨散明朝事痛飲狂謔外豈求  
豪氣元龍百尺樓宦情羈思白吾頭客中歲月消  
磨盡筆下江山次第收戀闕五雲長北望思鄉萬  
里復南遊何時報得君恩了問舍歸田此可求

次東軒詩韻二首

馳驅山路飽辛艱試此憑闌一解頽太守開尊同  
北海故人携妓擬東山山河形勝蓬瀛裏樽酒風  
流伯仲間若被主人勤挽袖傍人錯認謂予閑  
使君為政念民艱謔頌家家喜滿顏仁澤如今均

似雨聲名從此重於山君心自許龔黃後物議終  
歸召杜間我欲他時碑德政分明永使一兮閑

雲峯途中題寄高尹成三從事同年蕪簡金  
綾城李珣原兩同年

交親珎重五同年邂逅分離兩渺然更上雲峯回  
首望暮雲春樹思無邊

雲峯東軒次韻

頭流山色挿青空洞府深深細逕通妖霧百年爭  
戰後神功一捷笑談中四時雲氣長為雨萬籟秋  
聲易作風安得攀緣凌絕頂俯看初日海濤紅

咸陽齊雲樓次韻二首

岩堯傑閣高挿天自可登臨挾羽仙歲月幾何頻

四佳詩集卷之十  
三十二  
作客江山如此又開筵故人跌宕詩三百賢主風  
流酒十千月白夜深吹鉄笛白雲黃鶴想當年  
咸陽佳麗別藏天文酒風流即地仙徐邈一中會  
樂聖焦君五斗已驚筵上界有層樓十二孤雲已  
去歲三千洞中青鶴應無恙許我何時學引年

四佳詩集卷之十

四佳詩集卷之十二

第十

詩類

題崔彥甫所藏姜景愚青山白雲圖

山青幾百里雲白千萬重  
隱映招提古稀微樹木  
濃也須携客去準擬約僧逢  
却憶江南景年年愁殺儂

李議政仁孫妻氏挽詞

封大夫入福履繁壺儀慈範更雙全  
三公作配三遷教五子聯芳五榜賢  
富貴光華當代少哀榮終始後人傳  
流芳衮衮應無艾扶柩兕孫又滿前  
甲申重九前一日病中書懷寄吳隱君兼簡

耆伯

光陰冉冉歲時移，獨坐西窓有所思。病似文園空  
有賦，瘦於杜甫不因詩。多情白雪能侵鬢，有約黃  
花已滿籬。欲作重陽明日是，樽中有酒不須辭。

送執義姜公眉壽出守陝川

白雲南北是君鄉，具慶堂前春政長。陝水晉江連  
次第，錦衣彩服兩輝光。鸞鳳畢竟棲非棘，駟馬歸  
來敬有桑。聖代屈賢因孝理，豈冠應不世銅章。

次韻李次公見寄四首

病中白髮滿烏紗，造物小兒奈我何。獨坐敲碁人  
不到，可人胡不許經過。世味從來薄似紗，風情老去可如何。揚推寂寞堪  
消日，問字何人載酒過。

輕寒料峭撼窓紗，病骨酸辛長夜何。濁酒火爐燒  
楮拙，百年身世此中過。

詩成到處碧籠紗，當代騷人舊姓何。湖南風月牢  
籠盡，袖草何時許我過。

再和五首

古鼎燒香燭映紗，短屏孤枕冷衾何。年來老病唯  
耽佛，坐念彌陀百八過。

富貴輕於蟬翼紗，儻來軒冕柰子何。分明昨夜江  
南夢，白鳥雙雙掠水過。

梅花和月印窓紗，索笑巡簷柰興何。一夜冷香清  
到骨，玉人何處弄簫過。

剪剪輕寒薄薄紗，五更風雪一窓何。病餘自愧朝

叅懶卧聽鳴珂滿路過  
春衫何日試輕紗擁褐高吟歲暮何濁酒瓦盆生  
理足從教身世病中過

三和四首

白髮龍鍾滿皂紗功名歲月曾幾何冷官門戶清  
於水時有山僧問字過  
醲或如醇簿似紗交情其奈雀羅何更知多病故  
人少門外何曾長者過  
相對南窓半頂紗同年珍重意如何自慙非分文  
章手枉賦高軒日日過  
神翰揮來岸幘紗池塘春草句如何前身杜甫君  
休笑只覺讀書難字過

四和四首

北風捲地顛巾紗爭奈黃塵白首何自笑風情猶  
未減青樓時復醉扶過  
青天頭上隔烏紗顛酒狂謔外又何憶得去  
下飲滿城桃李雨初過  
手折花枝插帽紗高謔妙舞飲無何醉中不怕金  
吾令敲鐙鳴鞭走馬過  
醉眼矇矓似隔紗歸來和睡到無何破除萬事無  
過此百世光陰一鳥過

甲申仲冬庚申

藥甌茶鼎火爐温病骨酸辛夜氣昏羨殺兒童無  
管事通宵不寐笑談喧

去年建子月庚申棋友詩朋集四隣惆悵今年空  
抱病稠食豆粥坐吟呻  
大卧沉沉睡失明晨興聊復一杯傾小娃老婢爭  
相詫坐聽隣鷄唱五更

三尸篇

上帝何明明日夕監在茲人苟有善惡禍福皆隨  
之尸蟲是何物端蝮物莫微穴處肌膚間汚穢甘  
所滋安能記人過是是而非非掉爾三寸舌巧言  
如流簧俯伏訴玉皇好惡生髮瘡玉皇不信讒讒  
者反受殃况予信無辜平生不愧屋雖百三尸蟲  
何能蠅止棘兒童拍手笑笑予眠已熟兩鼻如雷  
鳴不知東方白

寄金察訪同年孟四首

下年不見我同年邂逅今朝夢宛然知子恥居王  
勃後慙予已着祖生先擬見溟鵬搏九萬曾聞櫪  
驥志三千朝廷選用皆公道刮目青雲有此賢  
斯文全盛憶曾遊屈指悠悠二十秋芸閣先生今  
老大鑿坡學士舊風流暮雲春樹頻年別沆芷澧  
蘭幾日愁白髮相逢青眼在劇談終夕不曾休  
人言大器晚難成頗信吹噓仗友生四海百年知  
已少一生萬事得時亨書無薦鷄何吾面缺有呼  
魚奈子情昨夜三刀來入夢莫言無路請長纓  
白髮紅塵事宦遊田園回首十年愁一生身世須  
知足萬古功名少到頭無才効力三宜去有法安

心四可休自是不歸歸便得達城山下有兔裘

再和四首

兩榜聯名世七年中間聚散兩茫然人生自古多  
離別名宦由來有後先老我肯中兵十萬何人門  
下客三千男兒得意寧無日為子行當頌得賢  
旅食京華十載遊黃塵烏帽鬢先秋旁觀世事迷  
當局勇退人情見急流作賦相如憑壯氣著書虞  
老為窮愁悠悠懶拙成何事未蓋棺前醉不休  
多子才華已老成虛聲箕斗笑吾生善名更與文  
名並吾道皆因世道亨江上青山曾有約鏡中白  
髮苦多情達城為接益城近他日歸休共濯纓  
嶺南何處可遨遊十載睽離段段愁鄉信聊憑犬

黃耳人情長愧烏白頭一朝邂逅詩相和萬事浮  
沉笑不休自哂功名成底事容顏皺盡癸貂裘

三和四首

卧病關門日抵年乾坤俯仰思悠然吾生自是前  
脩後道在曾知大極先博局時聞呼五百書籤欲  
觸滿三千燕閑所友餘何物藥有君臣酒聖賢  
兩腋何由汗漫遊空餘皮裏晉春秋頭邊白髮紛  
如雪夢裏青山滑欲流宦路無人曾鑑轍醉鄉有  
地可埋愁才微補衮寧無愧合退休時未退休  
明窓淨几恰詩成萬古知音有楮生身上毛裘牛  
殼棘爐頭石鼎豕彭亨迂踈自昔多文癖跌宕從  
來少宦情回首白鷗波浩蕩十年長愧縛塵纓

故人秉燭是良遊有酒能消萬古愁世事蹉跎生  
馬角功名卑屈爛羊頭狂譎痛飲生前樂雄辯高  
談死後休說與同年知此意相逢欲典鷓鴣裘

庚申後二日冬至書懷寄吳居士

昨夜庚申過今朝至日臨光陰真造次衰病易侵  
尋羸瘦空餘骨安閑只此心無人可與語有酒時  
獨斟

又題寄吳居士

仲冬今始雪庭院已堆葢茅屋迎長日梅花欲小  
春豆糜香可飲栢酒味方醇擁褐高吟處天時人  
事新

是日錫宴以病未赴

五更鐘鼓啟金門至日千官拜至尊君子道長開  
泰道聖人元化體乾元齊呼共祝岡陵壽錫賚均  
霑雨露恩臣病未參魚藻會幾番回首想班鷄

金同午孟寄詩送丹棗生薑次韻以謝

我今失調揮我面多生瘡故人珍重意遺我續命  
湯曾賢昔嗜棗孔聖不輟薑誓首拜嘉貺日夕滿  
意嘗

至日夕小風

亞歲日南至仲冬風北來小詩聊作草大易欲觀  
梅鬢雪分窓雪心灰異管灰不知添一線只覺老  
相催

病中寄吳隱君兼簡耆伯

風高落葉滿庭除養病閑居數月餘學道無成吾  
已老安心是藥語非虛時聞茶鼎鳴蚯蚓靜看書  
簞落蠹魚堪笑少年餘習在紙窓明處卧看書  
十年長愧抱沉疴造物小兒於我何瘦面吟詩還  
強項枯腸得酒易槎牙多君早歲能投紱許我何  
時學鍊砂更擬殘年成二老牆頭濁酒不須賒

寄濟州姜分臺 遇文李敬差 健

水國三千里相思十二時翠禽翻雪莠黃橘壓霜  
枝君作江南賦吾吟渭北詩何時軟行脚春樹聽  
黃鸝

哭姜同年景愚

痛哭景愚而至斯有才無壽最堪悲百年人物如

公少萬古聲名獨我知兒女縱多那有後功名似  
顯竟無施不禁老淚頻霑臆病裏空吟况也詩

蓮竹歎

有池莫種蓮有池當種魚有園莫種竹有園當種  
蔬有客拍手笑我癡胡竹種園蓮種池蓮花如甕  
竹如玉不得為子充甘脂種魚魚肥魚可烹種蔬  
蔬密蔬可羹全家十口飲葷羶亦可以此終吾生  
聞君生計長齟齬我昔不見今始悟煩君火急從  
我榮壅池為田園為圃我拜稽首謝客良客言正  
中吾膏肓平生好古好淡泊此外萬事都茫茫花  
柳之癖聊爾耳仕宦功名亦如此悅目養性復何  
益適口充腸差可利好客一笑告我歸我心不決



空依違雖然不有竹君石友吾何歸不有竹君石

寄金同年二首

老矣金芸閣胡然屈下僚多情唯白髮有信是青袍韓愈應披腹陶潛久折腰聖朝今可賀俊乂已旁招

珍重斯文在炎涼世態無才名君藉甚意氣我豪粗往復詩相就殷勤酒可沽人生得意耳大醉是良圖

再和二首

不才逢聖代多病愧同僚入夢唯松竹嬰身是芴袍江頭鱸縮頸秋後米長腰悵望思歸去青山苦

見招

酒詩安足有擔石本來無畫虎才何益安蛇計轉粗英雄生隴畝將相起屠沽豪傑如君少行行展壯圖

三和二首

濟濟多羣彥師師盛百僚風雲依輦路日月動宮袍白璧何須削黃金已滿腰防賢能不愧衆謗已先招

病裏三冬過閑中一事無茶湯思淡淡布褐愛粗粗索富詩頻藁囊空酒懶沽眼所無可物憐殺輞川圖

四和二首

焚香坐閉閣寂寂似僧僚往事思同榜交情憶共  
袍功名瘦馬背書史滿牛腰聖代雖非遇堪嗟楚  
些招

豪傑應時出賢良何代無士當明出處道亦有精  
粗末頭金易盡擯裏玉頻沽將相寧皆種麒麟滿  
壁圖

五和二首

誰知養病處亦有讀書僚小醉聊憑几餘寒可擁  
袍煎茶生蟹眼覓句得蜂腰可客來何晚唯且折  
簡招

常懷千卷在敢恨一錢無體小心空大論精見頗  
粗誰言利可釣我識名不沾行矣將歸去江山似

畫圖

夜坐卽事

惻惻輕寒雪滿窓爐頭香爇酒盈缸屏回八疊孤  
燈暗閑與狸奴睡作雙

晨興

年來病與老相攻坐擁綿裘怯冷風半頂烏巾驚  
白髮滿窓紅日攬青銅吟詩子美憐長瘦作賦昌  
黎送舊窮夕直朝衙渾不管瓦盆濁酒細君同

寄梁吏部薦金同年

芸閣先生性自真青衫依舊白頭新平津得士人  
皆說愧我元非薦鴉人

申同生自繩送红柿

小婢傳烏菹開看柿子紅味居蜂蜜上看到盧橘  
中頓覺肺消渴從知頭愈風故人鄭重意報答思  
無窮

題姜景愚畫八首

田婦汲水

蓬鬢荆釵茜色裙一生井臼爾辛勤長門寂寂蛾  
眉老爭似渠家老瓦盆

野客騎驢

高帽尖靴肩聳山客行隨意柳陰間騎驢如艇傘  
如屋未信人間行路難

仙客圍碁

喬木穿雲洞有天手談相對坐翛然從今我欲傍

觀去看到山中爛柯在

漁翁舉網

結網殷勤爾可憐當時意不在忘筌纖鱗滿眼何  
須數待得巨鼈斫鱠年

田夫偶耕

身世依違又一春石田茆屋夢頻頻畫圖今日依  
然是愧爾長鏡白柄人

竹

初看根露走龍日擬見予成栖鳳時終始分明大  
節在此心我與此君知

蘭

肉眼無人採國香人雖不採汝何傷牡丹已死薔

薇老捨汝誰能近坐傍

梅

冰雪精神鐵石心  
榜兄千古少知音  
西湖已遠放翁逝  
相對南窓我獨吟

金同年 孟携酒肉來訪

曾知多病故人疎  
珍重同年不負予  
折簡相從非偶爾  
高軒重訪又何如  
珍羞滿眼新魚鳳  
佳醕盈樽欲泛蛆  
中貺一朝恩到骨  
頽然不覺日將西

金同年見和復次韻

儒冠潦倒更龕踈  
世態人情孰記予  
老去情懷聊爾爾  
本來心性且如如  
鏡裏不嫌頭似鶴  
馬前已免背生蛆  
自斷此身當自斷  
功名已足漢征西

豆粥

紅日芽簷短  
清晨豆粥新  
然箕何用泣  
啜菽只堪貧  
倉卒劉文叔  
咄嗟石季倫  
古人今已遠  
滋味尚津津

夜詠

布被生寒紙帳鳴  
一天風雪夜三更  
花開燈盞自無數  
珠滴槽林時有聲  
無柰鬢絲愁後亂  
割教髀肉病中生  
誰家長笛輕三弄  
落盡梅花恨不平

送人休官歸嶺南

漢江江水碧如藍  
送子休官去嶺南  
松竹滿園長醉卧  
笑人白髮走青衫

兵曹判書尹同年 子雲 為三道入居都巡察

使金同年永瀉為從事官將行詩以戲之三首

司馬威靈動四方先生入幕姓名香南州自昔多  
人物北道從今總富強補國無才吾已老安邊有  
策子應長平生知己真難遇從事賢勞獨匪遑  
白髮休嫌佐碧油人生行樂是風流二三百郡繁  
華地四五六年爛熳遊鸚鵡杯深增跌宕鴛鴦帳  
暖飽溫柔可憐抱病同年老藥鼎方書坐擁裘  
嶺南佳麗接湖南多少樓臺間翠嵐從事榮華銀  
鈔帶佳人媚嫵紵長衫舊知不似新知樂醒興那  
如醉興酣自笑前身姜日用使星繞動病難堪  
同庚蔡子休回自燕京數月未得相見述懷

錄似子休之赴京僕別鴨綠江頭未幾僕  
病還并誌之三首

北去君遊日南歸我病時分離何草草邂逅又遲  
遲擬共閑中話相論別後詩邇來消息斷獨坐多  
所思

中年多疾病身世益無聊漸識容顏減誰憐髀肉  
消老宜甘寂寞夢亦厭紛囂慙几無人到爐香手  
自燒

良辰瞥眼過同甲宿心親欲任風流飲俱為聚散  
人何能逢袞袞尚憶語津津此意知誰會多君性  
自真

再用前韻寄子休兼簡淡叟

俊又登庸日功名少杜時慙子僥倖早恨子歷揚  
遲素性非耽酒雅懷只愛詩知音惟我輩生死兩  
相思  
年來頭種種漸覺耳聊聊捫虱青山坐圍棋白日  
消生涯真淡薄車馬隔喧囂病識冬宵永孤吟燭  
短燒  
詩書今已倦藥物只相親世態慙新進功名愧古  
人羨曾如曲逆詐不學平津莫說風塵事紛紛混  
質真

金同年孟贈禮部韻詩以為謝

韻書來自故人分稽首吾今謝厚恩可合書籤增  
萬軸應教筆陣掃千軍要須制字窮蒼頡不必識

竒效子雲况是雕蟲非我事雄文會見策高勳

復用前韻

十載吹竽混未分功名僥倖負宸恩自知性懶  
中散莫咲數竒李將軍世事浮沉紛似海人情翻  
覆開如雲倘來軒冕非吾事大卧乾坤酒策勳

栗子寄送彥甫

郭外茅廬小秋深栗子香當時共妻拾今日寄君  
嘗燒後黃於佛剎來白似霜聊共兒輩索敢望助  
膏梁

同庚尹淡叟問病而還述懷錄呈五首

自知多病故人疎時有同年枉弊廬邂逅悠悠維  
別後情懷袞袞笑談餘功名到手皆聊尔世事當

頭且自如更向樽前成一處人生得失付蘧藤  
鏡中白髮滿烏紗身世其於潦倒何瘦面吟詩負  
杜甫清心念佛病維摩衰腸諱食長供粥噪吻思  
湯只啜茶自西風情猶未減巡簷索笑訪梅花  
青燈半壁夜沉沉獨坐思君萬古心早歲有名沽  
白壁殘年無夢到黃金高山流水少知己白雪陽  
春空好音說與平生肝膽友歲寒交道共深深  
同甲情親自少時今知四十四年非君時佐幕踈  
還擯我故理輪病未歸青雲在眼何難取白雪渾  
頭不整飛共說逼人唯富貴故人衮衮幾黃扉  
病餘時復笑吾身懶拙悠悠性自真酒或二三杯  
則醉詩於五七韻如神雕蟲篆刻才何補置散投

閑興已新還怪邇來君不到殷勤往復莫辭頻

淡叟見和復用前韻兼簡蔡子休五首

懶拙平生世與踈閑中聊復愛吾廬從來軒冕儻  
來事自古功名憂患餘共笑冷官鄭學士誰憐渴  
病馬相如焚香閉閣無人到散髮飄蕭卧竹籬  
宦情世味薄於紗四十頭顛且病何舉白有時增  
跌宕汗青無復事編摩常懷少日牛心炙欲譜殘  
年蟹眼茶老去情懷渾少睡五更風雪落燈花  
功名宦海幾浮沉鉄石平生只此心未害許身希  
稷卨不曾交道托張金斯文已矣無顏色可容芟  
然有足音晚節香山差可擬世緣終淺道根深  
平生行止我依違愧使功名惹是非張翰尊鱸長

日好陶潛松竹幾時歸田園有約青山近湖海無  
心白鳥飛記得江南昨夜夢桂花籬落掩柴扉  
一生長笑百年身無奈清狂賀季真有酒相親頻  
樂聖無錢可使不須神功名困子青衫薄老病侵  
吾白髮新同甲交親緣不淺丁寧不惜寄詩頻

三和前韻寄淡叟無簡洪吏部應五首

平生計闊輒生疎四十辛勤有此廬富貴由來骨  
相在詩書自是糟粕餘人情淡薄君休怪世能醇  
濃我不如兀兀形骸天地內頽然真箇一蘧蓀  
白髮龍鍾滿皂紗光陰瞥眼迺吾何明時不分容  
糶散往事無心復揣摩安得病餘長健飯只知睡  
後苦思茶悠然又發新年興看到梅花又杏花

睡鴨香銷一炷沉閑中聊復見天心無方我學能  
食王有法人言可鍊金李杜生前當並駕期牙死  
後少知音殘年自哂平生事鉉繫區區歲月深  
天地中間六尺身言談雖拙性情真時時有酒能  
中聖往往吟詩或入神青眼故人渾似舊白頭交  
道免如新煩君為報平津閣無奈門庭畏客頻

四和前韻寄洪吏部尹談叟五首

曉攬青銅髮漸疎乞骸端合退村廬三年刻楮才  
何用十載吹竽愧有餘尚憶宣尼吾已矣不知曾  
點爾何如似予病物將誰比堪比人間竹席蓀  
北風剗地透攏紗孤枕寒衾病骨何早歲希賢窮  
萬里殘年學佛入三摩敢思俠客羔兒酒擬共山



僧崔舌茶一夜書窓清似水滿庭飛雪亂梅花  
人情厚薄一外沉喜子能堅歲暮心笑語時親溫  
似玉篇章日枉直如金人才復見重興運詩道折  
聞正始音潤色大平吾輩在相逢莫惜酒杯深  
少年往事思依依老病而今計已非一榜開筵狂  
復興同庚判會醉扶歸鑿坡詩酒吾顛倒翰苑風  
流子奮飛名宦邇來多聚散幾年南北阻柴扉  
僥倖登科早致身無華悃福是天真誰知福過能  
招禍自愛閑居可養神十載榮枯交道在一時冷  
熱世情新知君已仗吹噓力吏部時時枉駕頻  
甲申十二月初四日生辰  
唯庚是初度四十五春秋富貴何須隴功名已足

留兒無書可讀婦有酒相謀小醉酣乘興能消百  
病愁

翌日用前韻

一身虛度日兩鬢颯先秋詩酒生前有功名死後  
留懶因閑更甚病與老相謀晚節悠悠地無心賦  
四愁

又明日用前韻

四十真強仕英雄得意秋無功棠舍効有愧柏臺  
留敢作安身計長懷爲國謀君恩如可報餘事百  
無愁

薦金耆伯呈吏部

金公耄老真可人蹭蹬功名五十春愧我曾非薦

鷓者三刀有夢屬平津

金子固家春坊宴集邀予同飲以病不赴詩以爲戲

往事春坊似夢中一時人物揔英雄承恩北闕朝  
朝異侍講東宮日日同新文開筵傳故事先生赴  
召有遺風病餘恨不參高會想見斯文氣吐虹

明日又用前韻

高燒銀燭畫堂中滿座佳賓一代雄多子已拚文  
字會慙予未復笑談同杯盤狼籍知今日首着關  
干想古風瘦病何能博強健樽前痛飲快如虹

題姜景愚畫二首

浮雲出岫已無心老樹如龍風雨吟試問兩人相

計事入山猶恐不深深

當軒無穀碧檀藥滿意霜花面面看欲識先生無  
限興不如來此試憑闌

題辛霜臺仲磷詩卷

辛公以慶州判官新拜

監察分司御史柳同年孝潭詩以送之從而

和者數十人用其韻三首

朝廷方有道俊傑豈無人留攢清風在乘駟豪氣  
新功名終遠大步武不遠巡脚底青雲近看君兩  
鬢春

北闕詔還日東都遮道人分司詞語妙監察紀綱  
新賀席詩盈卷離筵酒幾巡莫言霜凜冽滿面此  
時春

十載同閤閉三年別故人相逢青眼舊已免白頭  
新折簡時能枉談棋又數巡温温真不厭有脚是  
陽春

用尹淡叟詩韻寄應之

閑居養拙數旬餘萬事紛紛我自如熱地共言人  
炎手冷官誰識出無車自愧散才昭代用始知多  
病故人疎有時投刺非干謁欲為山公薦鷄書

乙酉元日立春題寄吳同鄰

是日是元日今春今立春一時逢令節同樂共芳  
鄰盤菜葱芽細樽醪柏子醇屠蘇誰後飲慙愧少  
年人

人日又題寄二首

今日是人日因之憶故人七羹思欲共三醖與誰  
親竹色猶仍臘梅花已度春歲初酬令節從此勝  
遊頻

七日初頒賜君恩寵若驚一身無寸効十口有全  
生愧子欺干祿知予可代耕酒材倘可贖同里共  
杯傾

永川御林亭次韻

風流一春事庭院百花時烏帽折初頂珠簾故不  
垂高懷聊自適有客似相期時復揮金椀何妨醉  
作泥

謝金子固送饅頭

朱榼初開見饅頭白似霜軟温宜病口甜滑補衰

揚甕裏拖梅醬盤中搗桂薑居然能啖盡厚意儘  
難忘

次洪應之詩韻兼呈景醇淡叟五首

門堪羅雀日長扃僻地何曾好客經濁酒盈樽人  
面白終山當戶佛頭青袖中已草閑居賦座右常  
親陋室銘百念吾今灰已冷安心有藥制頽齡  
幽居寂寂類僧高洗手焚香讀佛經髮為病翁渾  
欲白眼因俗客不曾青死生自有琴棋友出入那  
無几杖銘早識百年如寄尔優遊聊復樂餘齡  
擁被高吟雪半扃會心唯有養生經閑中情興梅  
生白靜裏功夫竹殺青客至圍棋尋舊譜病餘戒  
酒揭新銘明時有味無能耳櫛櫟終然閱百齡

顛倒周公客叩扃開尊聊復慰來經豐年瑞雪天  
然白寒歲貞松狃也青多病只知皮骨在論交只  
可肺肝銘如予懶拙人誰記喜子情親自幻齡  
華顛奔走利名扃辛苦當年讀五經自笑當官無  
皂白可能馳譽有丹青忠勤前後孔明表警省東  
西張子銘回首故人嗟渺渺不才慙愧際千齡

再用前韻五首後二篇戲淡叟景醇

晝靜柴扉懶不扃悠悠觀物歲時經生前寄興思  
浮白身後流芳有汗青不辱已持知足計無思欲  
學息心銘明時事業吾何敢多子輩英最妙齡  
聖治如今戶不扃太平盛事幸身經文章人物優  
元白將相英雄有霍青子有功名舟楫用我無勳

業鼎鍾銘一心報國知何效聖壽南山祝萬齡  
三徑依稀半掩高此身自斷此中經當軒萬竹玲  
瓏碧排闥四山偃蹇青斗筲微才顏亦厚乾坤厚  
澤骨堪銘人生無似歸田樂黃菊蒼松送晚齡  
里仁爲義接門高伯仲相從日日經馬乳面當風  
兩黑梅花心爲雪霜青傳神滋味人誰料倒架風  
流事可銘行樂及時宜少壯如予病骨又殘齡  
葡萄倒架已頽肩不覺門前有客經主老鍾情雙  
脚赤細君齋怒兩眉青龍鬚顛落宜畫牛背蒼  
皇可鑑銘何似東鄰姜學士梅花樹下享椿齡

庚申夜題寄吳同鄰

八眼偏驚物候新新年樂事又庚申五更窓送梅

花雪一夜樽開竹葉春小妾不眠爭笑語老夫多  
病絕貪嗔想知此夕同鄰事相對細君穩酌頻

姨兄李其益年五十九中鄉試戲贈

平津七十始登科八袞三公佐漢家屈指今年  
未晚今年借計最堪誇

和其益兄韻二首

早年蹭蹬時難遇晚節飛騰事不乖鶴髮門生入  
莫笑龍頭高選喜無涯  
頭邊白雪渾無賴榜上黃金大有情共說六旬新  
及第奎星天下更文明

賀姜國鈞同年拜判事繕工監

判監官顯三品頭是子青雲得意秋驥德非徒稱

驥力龍頭從此近龍喉功名入手不難取富貴逼人那得休老去同年憑仗在賀情吾亦儘綢繆

寄朴同年允倫移栢樹

武陵何處訪羣仙知是君家洞有天若為移種蟠栢樹食實採花學引年

春日寄吳居士進退格

小窓扶病獨支頤頗覺今年帶減圍只可安心親藥餌不須談命問著龜日烘花樹紅將密雨入蓮塘綠漸肥清晝無人閑亦樂烏巾不整坐移時

見放海東青

平郊試放海東青為解蒼韞乍掣鈴劃地纔翻輕似電穿雲直上閃於星一心能事黃金介滿意雄

飛白雪翎更待上林親獵日奇才逸氣萬人聽

以韻吳同隣見寄三首

賞春期約報君知金谷當依罰不詩花柳滿城初過雨一年最是春好時

杏花消息雨中知驅使閑愁入小詩百五政當寒

食節三三五五踏青時

病裏春歸揔不知一春強半廢吟詩南窓晝日溫如王政是幽人睡足時

復用前韻戲之二首

我笑青春春不知青春應不酷耽詩如何使我身多病縱使詩成減舊時

君詩先寄我能知君比青春解愛詩為作惡詩三

兩首幽人扶病感春時

病中書懷寄李次公四首

一春渾是病多日苦無怵身世孤僧樣形骸瘦鶴  
容交遊多冷落人事漸踈慵瓦甕菊新酒時時憶  
子共

造物深為祟沉緜不可當長因親藥餌時復復壺  
觴梅柳春初度簾櫳日改長幽懷難自遣信口作  
詩章

強飯身仍困微醺睡亦酣重裘猶掩體短髮不  
簪守靜人為貴馳名我豈堪徒慙煩祿俸有謗懶  
朝參

熱客何曾記淡交尚不來蓮塘依舊築竹徑又新

開儻許時相訪猶堪獲小陪青春難報答老病苦  
相猜

再和四首

慙予空白髮愛爾自丹棕取友緣相合趨時敢苟  
容文園長日病中散一生慵捫虱青山坐無人笑

語共

一春相阻隔小雨更禁當獨坐詩頗藁相思酒滿  
觴病根難自斲愁緒烏誰長知子閑中興黃庭一  
兩章

春風燕已到山雨蟻初酣庭草將抽帶階篁自盍  
簪瘦軀如不勝狂興復難堪誰判蘭亭會扶衰直  
欲參

幽居靜如掃佳客不曾來竹節頭頭出桃花面面  
開園林甘守寂文酒憶追陪白髮知何事青春苦  
見猜

三和四首

感時驚節物多病少情悰處世身如寄開窓膝可  
容頗覺衣冠懶從教盃櫛慵瓦盆沽白酒聊復細  
君共

茅齋終日雨簷溜響郎當小坐三薰沐幽懷一詠  
觴割愁蒲劍短繫恨柳絲長晝靜人來少孤吟賦  
短章

踏青佳節近風日好清酣草軟羶宜坐花繁帽欲  
簷優游閑亦勝行樂病何堪願棄人間事將心飽

佛叅

白日悠悠度青春鼎鼎來功名顏已皺人世口難  
開桂榜當時會穉垣幾度陪至今渾似夢相喜不  
相猜

四和四首

感君遺好句知我滙卑棕淡交頸相刎炎門足不  
容謀生貧轉拙處事病還慵且喜高軒過清談日  
日共

一年最佳處三月今政當點也成春服義之泛羽  
觴秉燭猶嫌短看杯故遣長清狂餘故態自擬賀  
知章

雨來晴亦好物物逞春酣池澗青銅鏡山抽碧玉



四仙詩集十二  
二十三  
簪小桃嬌欲語細柳弱無堪俯仰觀元化三才自  
可參

暮春鶯不到社日燕初來階竹商量碧園花次第  
開更期佳節過長獲故人陪造物還多事年年病  
作猜

寄崔同年彥甫

病中春事不相知睡起東窓日政遲燕子不來人  
又靜一簾疎雨杏花時

三月三日又寄彥甫

寒食東風三月三桃花癡絕杏花慙病餘情思禁  
難得濁酒一杯生晚酣

賀尹淡叟同庚拜奉常尹

太常宜用老成人多賀同庚被選掄重到已享人  
物議長齋應任細君真功名藉甚輸君富老病踈  
慵坐我貧桃李滿城香雨過一杯何日斲相親

吉昌府院君挽詞四首

乾坤開泰運星岳降元臣策定艱難際勲高佐翼  
辰功名居鼎鼐昌像上麒麟忽此乘箕尾何人不  
愴神

兩手親扶日一心擔補天功先多亂日眼見太平  
年聖主方崇德皇天遽奪賢堂堂寧復有為國一  
潛然

富貴曾無憾堪嗟壽不長回頭五旬事得意十年  
強已矣千鍾樂居然一鑑亡知公九泉恨白髮有

高堂

情鍾雨兄弟風昔有襟期勲業人皆仰風流我獨  
知清談揮玉麈雅興映金卮無復聞餘論那堪涕  
泗垂

奉常柳小尹瞻惠鯉魚

故人遺我鯉魚雙相見春郊綠漲江準擬與君携  
釣去夜深明月倚蓬窻

夢謫仙詞

采石僊人騎鯨游采石明月空千秋好詩長留夫  
地間我不見人空長嘆我夢昨夜見天真白哲鬚  
鬚眉目新字我使前授一篇非道非佛非聖賢我  
不識字類甚類仙人鼓杖鳴鏗碗口占一詩進余

賈神叛手顛終不成仙人嗚然哀我昏手草瓊詞  
箋帝閣帝額太白分精光磊落載腹皆文章我拜  
稽首謝仙人仙人不語駕飛輪悵望行塵獻新詩  
喜得吾家寧馨兒嗚呼仙人不長見我夢惚恍瞥  
如電仙人一去來何時唯有古今長短詞

春日病起書懷寄子休五首

頗覺殘年病作媒吟官門戶為誰開枕書九藥光  
陰過寒食踏青節物催草色半勾烟漸暖桃花欲  
放雨頻來不知白髮非春事有興時時撥甕醅  
二月東風吹滿城乍寒乍暖乍陰晴柳絲拂地自  
無賴竹色過牆如有情杜甫與衣貧亦樂義之修  
禊病難成日長深院無人到睡起南窻沸藥聲

瘦骨稜稜鬢有絲蹉跎歲晚坐書癡閑知老物安  
心處病是幽人養性時自分揚雄甘寂寞試從莊  
叟學支離如君同甲方強健翻恨功名奈爾遲  
老矣吾曹感慨深同盟宴會懶相尋風流落魄當  
時事寂寞蕭條此日心薄宦憐君長踏蹙沉病愧  
我費呻吟丁寧有約酬佳節低唱宜教更淺斟  
此身多病可休休况復功名已足留郭外薄田渾  
半石山中老屋小於舟會聞有客騎黃鶴知有何  
人狎白鷗自斷此生當自斷誰言是興謾悠悠

甲子雨

甲子春來雨連朝不肯休欲知今歲事當與老農  
謀不識蒼天意空懷赤地愁聖君憂旱極大有記

春秋

全中樞補義來點灸穴而去遣女醫接常灸  
之為賦一絕誌之

白髮鴻樞愈健強人言醫術最精詳沉綿我病長  
年事救活君恩幾日忘頗信胸中多妙術誰知肘  
後有良方明堂訣罷還歸去裊裊香烟艾炷光

戲女醫接常

汝是女和緩活人應有方要須砭病骨不必撓剛  
腸信手渠能炷顰眉我忍傷深恩無以報聊復慰  
壺觴

蘭竹圖

檀欒石上竹馥郁腕中蘭胡為伴一畝以德非勢

干

寄同年申中丞自繩時中丞罷分巡居閑三

音

當年同榜卅三人屈指如今半作塵間閑陪從唯  
有子壺樽往復更相親蹉跎抱病連三月寂寞驚  
心又一春惆悵朝來落花雨倚闌無語岸烏巾  
門庭如掃寂無人閉閣焚香絕點塵自有楮生聊  
可語更無歡伯與誰親苔錢滿地因循雨花雪飛  
簾自在春病裏不堪歸去興呼兒直欲我車巾  
兩字功名老却人烏靴雙脚踏紅塵狂謀謬筭將  
焉用異論高談少見親病裏蕭條僧結夏醉餘搖  
蕩女懷春百年萬事無如酒莫負陶潛頭上巾

再和三首

同榜同隣我二人聯鞍十載禁城塵薇垣共列會  
相善栢府分司又暨親愧我病餘雙鬢雪多君醉  
後滿腔春殘年擬結香山社日日相從白氎巾  
已拚身世一閑人寂寂園林隔市塵老去功名皆  
外事病中藥物只相親閑雲倦鳥無非興細草幽  
花各自春靜坐焚香讀周易清心更整華陽巾  
經旬閉戶謝時人門巷曾無車馬塵石文竹君閑  
亦樂青奴黃姤老尤親大平有象醉醒日天地無  
私花柳春時復緬思今古事英雄勲業一綸巾

三和三首

咫尺芳隣隔玉人梨花明月澹無塵杜陵樽酒煩

同里元亮琴書欲話親暮鼓朝鐘浮世事賞心美  
景及時春雲臺死後功名字可博生前漉酒巾  
老年長愧少年人百丈霜毛萬丈塵魂夢尚迷黃  
甲會往來無復白丁親茶蘼蒲架先烘日芍藥當  
階欲殿春急喚小娃供一酌靜憑烏几頂紗巾  
林下何曾見一人此生汨沒利名塵幾年酷負青  
山約有夢相尋白鳥親痛飲狂譌空度日容身持  
祿動經春歸來儻得陶潛趣不乏先生錦里巾

四和三首

聖代登崇用俊人蜚英冠蓋九街塵功名將相夔  
龍後人物文章李杜親禮樂中興百年日謳謌同  
樂萬家春英雄袞袞麟上不用山林一角巾

甲子文科號得人杏園飛鞚蹴芳塵鑿坡忝選非  
吾分栢府騰名孰子親及見兩朝全盛日忻逢一  
代太平春腐儒自顧成何事未報君恩雪滿巾  
黃卷多時對聖人洒然心地炯無塵孔墻數仞思  
難及頽卷一瓢只可親豆粥裯衾長日樂野花山  
鳥一般春斯文未喪吾衰甚上帝明明照我巾

五和三首

玉堂曾記一時人不分踈才忝後塵際會自多逢  
聖主功名端為奉慈親悠悠未奏三千牘碌碌今  
過二十春僥倖明時慙竊祿莫言身世誤儒巾  
春來景物易撩人小雨廉纖不動塵飲豕雞兒渾  
漫與飛來燕子故相親溶溶院落梨花雪欲燼壺

樽竹葉春欲向東鄰扶醉去夜深明月滿烏巾  
小窓端坐病吟人懶拂詩書蒲架塵鷄黍恨無佳  
客至屢屢時復細君親閑看庭院落花雨夢覺池  
塘生草春百世人生行樂耳宦遊何用欲霑巾  
任子深金頤叟兩禮部來訪欲圍棋適當針  
灸未得開歡明日戲呈  
殷勤兩宰相時復訪頻頻灸病回無暇圍棋恨未  
親不饒唯白髮孤注是青春倘許重來過輸贏又  
一巡

寄頤叟求五加皮

羸瘦空餘骨沈綿病入脾醫無三折臂藥有五加  
皮細切烹茶日濃煎醖酒時高軒如見枉對酌不

須辭

寄頤叟求對金飲子

三人既已諾金子胡文來一飲頭風愈重煎胃熱  
開梨園花滿座春部酒盈杯為問膏梁客何會重  
藥材

再用前韻寄頤叟

東郭居閑久南宮枉駕頤皮毛唯世態肝膽獨情  
親日者經寒食風乎又暮春此時如有約對酌也  
無巡

謝頤叟送五加皮用前韻

辛苦病纏骨丁寧思壯脾藥難頭馬角借愧面牛  
皮六日採蟾處三年求艾時慙無白雪句望報黃

綰辭

謝頤叟送對金飲子用前韻

直惜詩篇到斜封藥裹來衰腸今可補笑口此能  
開細煎文武火調下聖賢杯有喜當勿藥終然老  
不村

春風詞送明仲之燕京

春風詞春風開遍長安花春江綠漲葡萄波春風  
背我欲歸去我送春歸愁奈何此時君來告我別  
欲別未別心似結拔劍一笑車載膏萬里燕山指  
如駿鴨綠江頭落花雨黃金臺前芳草路行行直  
抵帝玉州五雲宮闕承雨露君家會高牧與稼黃  
甲聲名動天下乃孫才調有鳳毛華人刮目稱

籍我昔觀光遊上都關門不惜終軍繻知君歷歷  
訪吾會歸來遺我驪龍珠嗚呼男兒有奇抱送君  
此去莫草草奈此送君仍送春春歸隔年君歸早  
君歸早為君詞渭城沙頭酒盡雙玉瓶更起聽我  
春風詞春風離別相思情

即事

久兩人皆喜雨晴數竿紅日紙窻明老妻不覺高  
聲語昨夜新蠶滿紙生  
女奴火急走乘林手摘新芽細似針報導今年風  
雨惡春寒生意怯難禁

同年尹兵判

子雲

保直禁內寄書有細雨梨

花情景撩人之語不覺韻羨率尔吟成近體

二首錄呈

文物昇平屬盛朝  
總戎勲業冠兵曹  
彤闈瀑直天光近  
清晝多閑日影高  
細雨梨花千玉樹  
東風楊柳萬金條  
從容奏罷平戎策  
餘事珠璣動彩毫  
一春衰憊阻朝參  
尚想夔龍晝接三  
直禁多時露賜酒  
還家無日不傳柑  
昇平潤色如君在  
老病蹉跎豈我堪  
安得梨花滿簾月  
一樽相對細論談  
金子固邀銀臺請  
相開筵招僕病不  
往赴二

絕

重裘猶覺曉寒生  
小雨天街意未晴  
病起不知春已暮  
滿簾紅雨落無聲  
諸公衮衮赴華筵  
病客長齋繡佛前  
莫遣佳人催

羯鼓也能驚起午時眠

子固更請赴召戲贈二絕

三月長安花滿開  
南鄰請赴綺筵來  
前身日用君休笑  
老病年來諱酒杯

獨坐窻前笑不休  
病餘時復作風流  
小娃試學南鄰會  
為折花枝插白頭

新得隙地于園東  
闢為菜圃蔣香蔬  
數十種病後巡園有作

寸土由來貴於玉  
我家從此重如金  
誰知今日開畦意  
始償當年學圃心  
雨後尖新蔬子長  
田頭斜整棘籬深  
人生咬菜餘何事  
立向東風興不禁  
子深願叟約以重  
過不來寄呈



窮廬一蠅角賢相兩龍頭再賦高軒過真成暇日  
遊客來難袞袞春去政悠悠滿院梨花月無入簾  
半鉤

崔彥甫寄紫豆種

病起真成老圃如扶筇日日課園蔬春來紫豆君  
能寄夏去青苗我自鋤結子宜無炊稻飯落糞終  
可秣征驢殷勤種罷堪乘興昨夜田頭雨一犁

讀李白詩

李白高才世不多風流曾見八仙譔沉香亭北花  
如海採石江頭月似波賀老交情松下土汾陽高  
義日邊霞騎鯨一去無消息千載何人續大家

次韻鄉人崔上舍

孟淵見寄五首

入林猶恐不深深子有高蹤未可尋愧我紅塵空  
白首十年憔悴學南音

達城山下故山深三逕荒涼有夢尋已作束書終  
老計早知林下有知音

茆屋竹籬深復深山僧野老日相尋人間無似田  
園興浮世功名過好音

吾家盤谷窈而深時復經丘壑可尋稚子候門休  
悵望憑君歸去報先音

琴湖流水半蒿深笠澤鷗盟擬欲尋更有公山多  
少寺共君歸去聽松音

同年趙稚圭茅諸同年賞花送春以病不赴  
君家庭院百花時年去年來賞有期細細紅霞蒸

躑躅溶溶白雪瀉荼蘼只因多病愁難遣未赴華  
筵恨可知欲餞青春無客共小娃穩酌勸傾卮  
海棠移自景醇家蔣園中七年于今始花開  
矣感而有作

辛苦移來為見花七年始見喜如何依稀高樹八  
九尺點綴繁英三兩窠娟娟光風深別院遲遲紅  
日暖晴沙古人餅說嬌嬈處開未開時態政多  
國俗以玫瑰為海棠僕嘗考花譜移景醇家  
者似是真然亦未知真贗也仍和前韻

玫瑰名竊海棠花肉眼紛紛奈汝何好事我曾尋  
舊譜移根今見綻新窠臙脂初着迎朝旭香玉飄  
殘點晚沙莫說無香添五恨看看終日賞心多

同庚辛敬叔來訪云我家亦有所謂海棠者

即遣童奴折來示之與移景醇家者相似又

和前韻

兩家竒種一般花折得相看閑事何並蒂紛紛霞  
作蘂同條點點錦成窠最宜穠艷蒸紅日可忍飄  
零糝白沙錦里無詩真寂寞我吟長為海棠多

餞春

我送東君底事忙黯然離別欲銷腸殘花冷蘂皆  
無賴戲蝶遊蜂亦自傷天上留春那有訣人間絆  
日苦無方繁華一去經年事為惜餘暉酌酒觴

絕句

光風香媚海棠花小雨池塘生綠波遲日濃陰入

寂寂一雙睡鴨占晴沙

牧丹

東君捲却一春殘當日風流屬牧丹欲識無心動  
人處乍醒初解凭闌干

惜牧丹

不用催開羯鼓為開須緩緩謝遲遲何人牋告天  
閣去借得濃陰護四時

荼蘼

朝雨淨如洗荼蘼花滿枝玉人相對語瑤島幾時  
來照水清涵影侵樽冷潑醅我尤憐淡泊欲去更  
徘徊

初夏即事

曲檻踈檼燕語慵楊花撩亂透簾櫳細君剪紵裁

新服婢子穿針學細縫

屋頭初唱午鷄聲庭院深深晝景清稚子移書防

燕汚老婆臨紙看蠶生

夏日

絕小茅齋面曲池清和四月最佳時好風陣陣柳

飛絮細雨濛濛花滿枝枸杞叢深眠鴨子菰蒲影

動露魚兒病餘憑仗唯筇在散步行行過竹籬

偶吟

歲月如飛鳥吾生似繫匏才疎三兔窟謀拙一鴉

巢多病真如此浮名倘可拋等閑時讀易隨意兩

三爻

無言甘似齋有味苦如飽蝶愛連花寔鷲看接葉  
巢一生徒自苦三業竟難拋否泰皆關數時時玩  
象交

書懷寄可成稚圭兩同年

往事鑿坡升二春一時博士我三人功名蹭蹬真  
相似心事蹉跎不可陳頗信後生深可畏唯餘舊  
物獨情親分明物理乘除在晚節相從白髮新  
明日淨業院進瑞露百官賀禮以病未參  
奔走千官進賀牋佳祥川至日相連覺皇靈異三  
千界聖代昇平五百年小康已軼熙民物上瑞頻  
煩記史編不用別求堯率國家香火共安眠  
題雙梅堂集後彥甫所藏倩書題曰

作詩差易品詩難具眼何人字細看寫罷雙梅題  
目了世無尼聖孰能刪

送戒澹還鷄龍故山

我送澹師去鷄林路渺茫晨征猿自導夜宿鶴相  
將一身浮宇宙雙足滿風霜東院他時話三生結  
願香

余早識峯上人有不得相見者二紀一日來  
謁余仍言曰峯卜地于鷄林南山開精舍數  
楹左右圖書逍遙吟咏於其間山中四時之  
樂有不可勝言者峯將老于此寂于此日者  
遊方千里來抵于京明當杖錫言旋幸先生  
賜一言修吾精舍余久病之餘閣筆停吟者

有日重遺師命走書近體六首以贈行軒云  
何年精舍側金開萬里江山入座來鰲極天低連  
瀚海鷄林日出近蓬萊半月城頭黃葉落瞻星臺  
下白雲堆上人一隻乾坤眼坐瞰東溟小似杯

右摠言精舍景趣

春山寂寂一招提隨意閑行輒杖鞋竹色玲瓏侵  
小砌花香荏苒渡前溪閑雲倦鳥思無累流水高  
山理本齊出定有時還入定禪心已作絮霑泥

右春

青山窈窕深復深老樹如龍布樾陰岩溜洒空渾  
作雪松濤滿壑響於琴白雲渺渺飛黃鶴綠竹搖  
搖拂翠禽未信人間汗如雨軒窗六月爽頰襟

右夏

草堂秋雨滴梧桐一陣新涼蒲院中水北水南葦  
花白山前山後檉葉紅乾坤萬里高飛鴈風露三  
更獨語蛩入夜情懷清似水碧空明月小樓東

右秋

積雪飛飛玉萬層山中無路滑凝冰瓦爐終日香  
烟裊土突通宵火氣騰松雪撼風鳴紙帳梅花和  
月映紗燈蒲團默默跏趺坐客至從真喚不應

右冬

不見上人今世年重來面目摠依然遊方始償三  
生願面壁會參一味禪交遊我欲同支遁詩句師  
應繼善權去去故山何日到也知松偃上方前

右叙離迨離別之意

蓮塘即事

新荷出水疊青錢  
柳絮生憎白似綿  
忽有雙飛青鳥過  
小塘分得半江天

白雲一首

白雲誰道是無心  
我望紛紛變態深  
何事等閑遮日月  
有時得所向山林  
七年不用資湯旱  
三日唯須作說霖  
更要長風吹掃盡  
乾坤萬里破重陰

吳居士金耆伯來訪

長抱支離病  
那堪寂寞心  
一時皆附熱  
兩子舊知音  
倒屣時相迓  
開樽夜已深  
明朝如有意  
莫惜更携琴

種薑

茆屋朝來雨  
巡園趣政忙  
縱橫治舊壠  
踈密種生薑  
樣比龍頭縮  
芽生雀觜長  
殷勤當護惜  
不輟也宜嘗

絕句即事

消  
枝頭乳地鵲  
花下午時猫  
忽有客經過  
圍棋長日

尹同年子雲入都堂

麟閣丹青倚  
重臣潭潭相  
府尚青春  
誰知老物尤  
深賀甲子同  
年第四人  
區區末技是  
文章病老年  
來愈健忘  
置散按閑宜  
我分布衣之  
極足於良

開窓

開窓虛入達四顧是青山極目飛鴻沒支頤倦鳥  
還披襟風已快容膝日長閑身世知何處羲皇上  
世間

茅齋

綠樹三重蔭黃茅一小齋棋書聊適意物我已忘  
懷雲影初移枕苔痕欲上階朝昏眠且食亦可送  
生涯

申同年

自編

用贈崔同年彥甫詩韻見寄次

韻五首

病裏踈慵誰得知日高三丈起眠遲忽聞剝啄初  
驚覺政是幽人折簡時

閑中春事或相知捲盡踈簾小坐遲要遣童奴休

掃地滿庭風雨落花時

夕直朝衙懶不知巡園時復得歸遲細看樹樹花

開遍記得前年移樹時

自西閑居強事知春歸大速客來遲踏青寒食皆

消盡都是幽人閑閣時

四十頭顱已可知年來多病漸衰遲一春強半愁

邊過辜負芳菲三月時

再和五首

子有才名一世知如何作相十年遲正當霖雨思

賢日擬見明堂作棟時

人間萬事可前知物理分明有早遲李白桃紅一

時事松篁可見歲寒時  
濃淡人情百不知功名真似磨驢遲妨賢十載寧  
無愧未有絲毫補聖時  
區區溫飽外何知持祿容身歲月遲自有古人先  
得我堯夫生死大平時  
翻雲覆雨我能知莫說同年見事遲老病侵尋官  
獨冷交遊不似少年時

三和五首

相從里閑有心知欲和新詩覓句遲忽憶微垣當  
日會梨花庭院雨晴時  
花落花開次第知芙蓉出水嗟較遲問君能記年  
前事翠蓋紅粧細雨時

病骨陰晴聖得知春宵苦短苦嫌遲蕭蕭昨夜空  
階雨恰似糟牀壓酒時  
酒熟君家報我知也須扶病飲遲遲杏花踈影月  
明夜看到衰翁醉倒時  
萬事無如睡不知悠悠身世且捫遲直將閭閻同  
年會看取耆英作會時

四佳詩集卷之十二





